



## Vedtak - UKM 07/13

### Kyrkje 18-30

### Rom for samtale og engasjement

#### Innleiing

«Kyrkje 18-30» har vore ei satsing i Den norske kyrkja frå 1993. I 2013 handsama Kyrkemøtet ei sak om unge vaksne. Dei sa: «Kyrkje 18-30» handlar om å vere kyrkje i vår tid. Kyrkjemøtet oppmodar heile kyrkja til å styrkje medvitnet om å vere ei livsnær, relevant og tilgjengeleg folkekyrkje for alle.

**Eit resultat** av satsinga på Kyrkje 18-30 er antologien «Livsnær, relevant, tilgjengelig» utgjeven av Kyrkerådet i 2013. Gjennom fagartiklar, reportasjar, samtaletema og tips framhevar antologien nokre moglege vegar å fylgje, og gjev inspirasjon til handling, slik at det kan utviklast gode strategiar i kyrkjelydar, utdanningsinstitusjonar og organisasjonar.

**UKM 2013 ynskjer å løfte fram** nokre refleksjonar, konkrete forslag og oppmodingar som oppfølging av antologien. På denne måten ynskjer UKM 2013 å gjere orda i antologien om til handling, slik at unge vaksne opplever at deira livserfaring og tru kjem sterkare til uttrykk i kyrkja. Det er lagt ned eit stort og viktig arbeid med utarbeiding av antologien, utfordringa no er å finne gode måtar å nytte materialet på.

**Menneske i alderen 18-30** år er ei mobil og mangfaldig gruppe. Mange er i ein livsfase prega av val, oppbrot og etablering. Samstundes er kyrkja alle døypte og kjem til syne når menneske med felles tru samlast om ord og sakrament. Vi er alle eitt i Kristus og har behov for å leve som heile menneske med ande, sjel og lekam. Å vere eit heilt menneske inneber å ta på alvor alle delar av livet slik det er. Derfor er det viktig at kyrkja er ein stad der ein kan byggje relasjonar, tillit og tilhøyrslø. Kyrkja må vere ein stad der også menneske i alderen 18-30 år kan utøve engasjementet sitt, få påfyll og praktisere trua si gjennom ulike tilbod. Dette vil seie at unge vaksne treng forkynning og fellesskap retta mot livsfasen deira. Mange unge vaksne opplever at det einaste høvet til å vere aktiv i kyrkja er å vere leiar. Unge vaksne treng òg ein stad å samlast. Dette kan verke rekrutterande for dei som kyrkja vanlegvis ikkje når. Samstundes er det viktig å ikkje ha ei spesialisert kyrkje, men ei felles kyrkje for alle døypte.

#### Samarbeid og møtepunkt

**UKM 2013 ynskjer** at Den norske kyrkja skal bli betre til å nytte breidda av unge vaksne som ressursar i kyrkjelydane. Det å vere frivillig medarbeidar i kyrkjelyden er ein av fleire måtar å engasjere seg på, og kan vere eit møtepunkt og skape fellesskap for unge vaksne. Områda for frivillig medarbeidarskap rommar meir enn ungdomsarbeid og gudstenestearbeid. Ein må tenkje breitt om større og mindre oppgåver, slik at alle som ynskjer å bidra i det frivillige medarbeidarskapet, kan

#### Ordforklaringar

##### Antologi

Ein **antologi** er ei tekstsamling, det vil seie ei bok med fleire litterære tekstar, ofte innanfor same sjanger, men frå ulike forfattarar. Ordet stammar frå gresk og betyr opphavleg «blomstersamling».

##### SBU er Samarbeidsrådet

for barne- og ungdomsorganisasjonar er eit møtepunkt mellom Kyrkerådet og dei kristne barne og ungdomsorganisasjonane med arbeid knytt til Den norske kyrkja.

**Kyrkje 18-30.no** er ein nettstad der ein finn idear, refleksjonar og ressursar om korleis ein kan arbeide for og med aldersgruppa 18-30 i kyrkja.



finne eit område for teneste, vekst og utvikling for trua si.

UKM 2013 er glad for at kyrkja har fokus på involvering i kyrkjelydane. Derfor er det viktig at utdanningsinstitusjonane også inkluderer opplæring i korleis ein kan involvere og følgje opp frivillige medarbeidarar på ein god måte, i dei kyrkjelege utdanningane sine. UKM 2013 meiner at utdanningsinstitusjonane også bør inkludere satsinga Kyrkje 18–30 i dei kyrkjelege utdanningane. Dette kan ein til dømes gjere ved aktivt å nytte antologien «Livsnær, relevant og tilgjengelig» og ressursane på nettsida kyrkje18-30.no.

**Dei tilsette i kyrkjelydane** har ansvar for å rekruttere, utfordre, fylgje opp og rettleie frivillige medarbeidarar innan tenesteområda sine. Mange gjer eit godt arbeid med dette. Like fullt er det viktig å vere merksam på at omgrep som «leiing» og «medarbeidarskap» er i stadig utvikling og har eit fagmessig innhald som dei tilsette i kyrkelyden må få tilbod om å få oppdatere seg på. UKM 2013 vil understreke at dette er eit kontinuerleg arbeid. Samstundes har menneske i aldersgruppa 18–30 år også eit sjølvstendig ansvar for å utfordre andre i aldersgruppa til å vere med som frivillige.

**Mange tilsette** i kyrkjelydane møter menneske i aldersgruppa 18–30 år gjennom dåpssamtalar, vigselssamtalar osv. Dette er viktige møtepunkt for kyrkja, for å vere relevant for den gruppa av unge vaksne som vanlegvis ikkje oppsøker kyrkja. Mange av desse søker også til kyrkja i samband med høgtider.

**Det vert allereie** gjort mykje godt arbeid for aldersgruppa 18–30 år både i og utanfor Den norske kyrkja. Mykje av dette arbeidet vert også drive av dei kristne organisasjonane, og UKM 2013 vil halde fram nytta av å ha eit godt samarbeid der ein dreg veksjar på eksisterande kompetanse og ressursar. Det er viktig å ikkje skape konkurrerande tiltak, men samarbeide om å samle folk frå aldersgruppa. Eit døme på dette kan vere at organisasjonane får nytta lokale i kyrkja. Dette arbeidet og samarbeidsrelasjonen treng ein å tenkje strategisk rundt. UKM 2013 meiner at Den norske kyrkja kan samarbeide tett med organisasjonane om ulike tilbod til aldersgruppa, utan at verken kyrkja eller organisasjonane seier frå seg ansvaret sitt.

**Kyrkja ynskjer** å vere eit sosialt samlingspunkt der liv og tru kan delast. Det er avgjerande å byggje gode relasjonar og fellesskap både til den lokale kyrkja og Den norske kyrkja nasjonalt. Dette vil bidra til å skape identitet og eigarskap til kyrkja, slik at ho vert opplevd som livsnær, relevant og tilgjengeleg for alle døypte. Det kan igjen føre til at Den norske kyrkja vert oppfatta som lettare tilgjengeleg, og vert ein naturleg stad å oppsøkje når ein flytter til ein ny plass. For å nå ut med informasjon om ulike tilbod er det viktig at kyrkja nyttar aktuelle informasjonskanalar for unge vaksne. UKM 2013 er glade for den store IKT-satsinga i Den norske kyrkja. Vidare i den samanheng ynskjer UKM 2013 at Kyrkjerådet skal lage ein felles app for heile kyrkja som kan romme informasjon om ulike tilbod frå kyrkjelydane. Ein slik app kan vere samlande og vere ein nyttig informasjonskanal særleg når ein flytter til ein ny plass.

**UKM 2013 er kjent med** at det nokre stader er ulike tilbod særskilt retta mot Kyrkje 18–30. To døme på tilbod som viser godt samarbeid mellom Den norske kyrkja og organisasjonane, kan vere den opne barnehagen til Norges KFUK-KFUM i Fana kyrkje og unge vaksne-kyrkja Majorstua+ i Oslo. Desse arbeida syner ulike måtar å treffe målgruppa på. Her har ein våga å tenkje alternativt for å nå målet om å vere ei livsnær, relevant og tilgjengeleg kyrkje for ei særskild gruppe. Kvar einskild kyrkjelyd



treng ikkje å ha eit slikt tilbod, men UKM 2013 oppmodar til å sjå på mogleg samarbeid mellom fleire kyrkjelydar og organisasjonar.

**Musikk er viktig** i livet til mange unge. Gjennom arbeidet med ny salmebok er det no mogleg å få stor variasjon i musikalske uttrykk i gudstenesta. Musikken er med på å løfte gudstenesta og det lokale arbeidet i kyrkjelyden. Det er også gode høve til å setje lokalt preg på gudstenesta. Samstundes kan musikken vere med på å forme det lokale arbeidet i kyrkja utover gudstenesta, til dømes som øvingslokale for band og kor-arbeid for unge vaksne.

**UKM 2013 ynskjer å trekkje fram** det gode arbeidet som vert gjort av studentprestar, feltprestar og andre spesialprestar. Dei treffer mange i aldersgruppa 18–30 år som vanlegvis ikkje oppsøker kyrkja. UKM 2013 vil derfor understreke kor viktig det er med gode ordningar for spesialprestane.

## Oppmodingar

- **UKM 2013 oppmodar kyrkjelydane** til å finne lokale samlingspunkt der det er høve til å samlast til meir eller mindre formelle arrangement for å skape møtepunkt og opne for at aldersgruppa 18–30 år kan fylle kyrkja med det dei er opptekne av. Det er viktig at kyrkja kan vere eit lokale som også frivillige kan nytte til eigne arrangement.
- **UKM 2013 oppmodar bispedøma og organisasjonane** til å kartleggje eksisterande regionale og lokale samlingspunkt for aldersgruppa, og gjere denne informasjonen lett tilgjengeleg.
- **UKM 2013 oppmodar SBU** til å halde fram med å ha fokus på arbeidet med Kyrkje 18–30.
- **UKM 2013 oppmodar bispedøma** til å sjå på ungdomsrådsgjevarstillingane ved bispedømekontora. Det er ynskjeleg at kvart bispedøme har ei ungdomsrådsgjevarstilling som er stor nok til også å vareta oppfylging av arbeid med aldersgruppa 18–30 år.
- **UKM 2013 oppmodar bispedømeråda** til å gjere kursopplegg om oppfølging og rekruttering av frivillige medarbeidarar tilgjengeleg for tilsette i kyrkelydane .
- **UKM 2013 oppmodar Kyrkjerådet** til å vurdere ein felles app for heile Den norske kyrkja som del av den nye IKT-satsinga Kyrkjerådet er i gang med. Dette må og sjåast i samanheng med nettstaden kyrkje18-30.no.
- **UKM 2013 ber utdanningsinstitusjonane** om å inkludere Kyrkje 18–30 i dei kyrkjelege utdanningane og oppmodar til å nytte antologien «Livsnær, relevant og tilgjengelig» og ressursane på heimesida kyrkje18-30.no i arbeidet med dette.
- **UKM 2013 oppmodar ungdomsråda** til å ta saka om Kyrkje 18-30 tilbake til sine bispedøme og arbeide vidare i sine ungdomsråd og ungdomsting.
- **UKM 2013 understrekar** kor viktig det er å ha eit sterkt demokrati i Den norske kyrkja og ber **Kyrkjerådet** om å halde fram med arbeidet med relevant informasjon til aldersgruppa 15–30 år ved kyrkjelege val.
- **UKM 2013 oppmodar alle ledd i Den norske kyrkja** til å nytte antologien «Livsnær, relevant og tilgjengelig» aktivt i arbeidet sitt.
- **UKM 2013 oppmodar oss sjølve, og andre i aldersgruppa 18–30 år**, til å engasjere seg i kyrkjeleg arbeid.